

Malaysia elak ulangi kesilapan Jepun: PM

BH 28 JUL 2001

KUALA LUMPUR, Jumaat – Datuk Seri Dr Mahathir Mohamad berkata, walaupun Jepun akan terus dijadikan contoh oleh Malaysia dalam proses pembinaan negara, Malaysia akan berhati-hati dan mengelak daripada melakukan kesilapan sama yang dilakukan negara itu.

“Anda juga boleh belajar daripada kesilapan orang lain, apa yang kita lihat di Jepun hari ini ialah terdapat banyak kesilapan dan kami akan mengelak daripada melakukan kesilapan sama,” katanya pada satu temu bual dengan televisyen NHK Jepun, yang disiarkan Astro Selasa lalu.

Temu bual itu, yang diadakan sempena 20 tahun Dr Mahathir menjadi Perdana Menteri, diadakan di Putrajaya. Salinan rakaman temu bual itu diedarkan kepada Bernama.

Beliau berkata, bagaimanapun, buat masa ini, Jepun bukannya contoh yang baik bagi Malaysia.

Perdana Menteri ditanya sama ada beliau masih mahu menjadikan Jepun sebagai contoh kepada Malaysia bagi Dasar Pandang Ke Timurnya, memandangkan Jepun kini sedang berusaha keras memulihkan ekonominya yang tidak berkembang sejak 10 tahun lalu.

Dr Mahathir berkata, Jepun akhirnya akan berubah dan seiring seluruh dunia.

Bagaimanapun, katanya, ia tidak boleh berbuat demi-

kian dengan tergesa-gesa hanya kerana ia dikritik orang lain.

“Jepun telah memutuskan bahawa ia perlu berubah dalam cara ia melaksanakan sesuatu. Ia perlu ikut apa yang dikatakan oleh Barat sebagai amalan terbaik. Apabila anda cuba mengubah sesuatu, anda selalunya mewujudkan kemusnahan,” katanya.

Mengenai peranan Jepun di Asia, Dr Mahathir berkata, negara itu perlu terus memberi tumpuan terhadap rantau ini, sensitif terhadap keperluan negara kecil serta bersedia membantu mereka dengan teknologi baru.

Program selama 20 minit itu turut memaparkan sedutan seperti debat antara Dr Mahathir dan ahli kewangan George Soros mengenai perdagangan mata wang dan ucapannya pada Perhimpunan Agung Umno, baru-baru ini.

Perdana Menteri turut ditanya mengenai bagaimana penubuhan Perundingan Ekonomi Asia Timur (EAEC) dan Tabung Pembangunan Asia yang beliau cadangkan, memberi manfaat kepada negara Asia dalam menghadapi globalisasi.

Beliau berkata, jika setiap negara cuba mempengaruhi tujuan globalisasi secara sendirian, ia tidak akan memberikan sebarang kesan.

“Tetapi jika kita dapat berbincang antara satu sama lain terlebih dulu dan menentukan jenis globalisasi yang memberi manfaat ke-

pada seluruh dunia, saya fikir orang akan dengarnya kerana ia adalah sebuah entiti yang besar.

“Ia adalah satu pertiga daripada pasaran dunia dan dengan itu orang perlu mendengarnya,” katanya.

Mengenai Perhimpunan Agung Umno bulan lalu, beliau mahu mengingatkan orang Melayu mengenai zaman prakemerdekaan supaya mereka tidak membuat kesilapan sama.

Sementara itu, Dr Mahathir berkata, tugas besar selanjutnya ialah memindahkan kuasa dengan lancar kepada penggantinya.

“Jika saya boleh, saya ingin mengundurkan diri sekarang, tetapi saya tidak dibenarkan berbuat demikian, malah saya tidak dibenarkan bercakap mengenainya oleh rakan saya kerana kata mereka, ia akan mengganggu.

“Anda cakap mengenainya pasaran bertindak balas, orang ramai bimbang dan perkara seperti itu. Jadi saya tidak bercakap mengenainya. Tetapi saya bersedia berundur pada bila-bila masa jika rakyat mahukan saya berundur. Saya tidak mahu memegang jawatan ini terlalu lama,” katanya.

Mengenai Malaysia selepas ini, Dr Mahathir berkata, beliau mahu melihat negara terus aman dan stabil dan berusaha memastikannya tetap merdeka walaupun dunia melaksanakan globalisasi. – Bernama